



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tiryimym@aolima



tir yimym

TAPAK 3

Budapest Ranking Series: Wrestler Anshu-i silver medal angu



Tanü nikongdang Narendra Modi-i Ato kilonser tenangzükba agitsü



VOL. XXI ISSUE NO. 237 (ADOK 237) DIMAPUR AMUNGNÜ (SUNDAY) AAMI (JUNE) 09, 2024 ₹ 5.00

RPP-i Assam CM Sarma aitsür

Dimapur, June 8, 2024 (TYO): Tawa Lok Sabha election nung North-East Democratic Alliance (NEDA)-i Nagaland, Meghalaya aser Manipur nung takok manguba ya Khristantem ajanga lir ta Assam Chief Minister Himanta Biswa Sarma-i tai tongloksüba magizüker ta Rising People's Party (RPP)-i ashi.

Himanta Sarma-i mapang shia Khristantem aija arur aser tangbo pai NEDA tamakok anguba atema Khristantem aitsür, ta RPP-i ashi.

Tamangba yimsü balala süaka voter temi party koba nung vote enoktsüsü angateta lir. Inner Manipur nung Hindu Meitei nungeri Congress nem vote enoktsüogo. Prime Minister

Modi-i Manipur nung mepetmesü atema teinyaktsü tim meinyakba atema tejashi nung parnoki iba ya inyak, ta RPP-isa metetdaktüsü.

Sarma dak yimya tamajung lir aser mejembitsü o jembiba ajanga Chief Minister's office akhüm mali kümdaktüsü. Nagaland nung Naga nungeri 'Okora Naga' tatalokba atema kecha mashi toktüsügo ta RPP-isa ashi.

JDU Nagaland aser NDPP candidate-ia Nagaland nung Congress-i takok anguba atema NBCC aser Dr. Villo Naleo aitsür, saka iba ya parnoki voter tem mezügmeshiba ama lir. NEDA-i tamakok anguba ajanga Nagaland aser Meghalaya chief minister temi Sarma dang nungi jenbutüsü imlar, ta RPP-isa metetdaktüsü.

NDA 3.0 sorkar nung TDP Minister 4, JDU Minister 2 adentsü akok

New Delhi, June 8, 2024 (Agencies): Prime Minister Narendra Modi-i aniba NDA 3.0 sorkar nung Telugu Desam Party-i cabinet menden 4 aser Janata Dal (United)-i menden 2 angutsü akok.

Chandrababu Naidu'er TDP nungi Ram Mohan Naidu, Harish Balayogi aser Daggumalla Prasad nunger PM Modi'er cabinet tasen nung züngsemtsü akok ta osang angazüker.

Külen, Nitish Kumar'er JD-U-i Lalan Singh aser Ram Nath Thakur na tenüng agütsüogo.

Iba lemtet ya National Democratic Alliance (NDA)

senden nung agi aser asung sorkar tezüngzüktep agiba sentong magidang cabinet mendentem lemsa.

Andhra Pradesh nung TDP-i Lok Sabha menden 16 nung takok anguba sülen cabinet menden 4 aser parliamentary speaker meshir. Bihar nunga JD(U)-i menden 12 nung takok anguba sülen cabinet menden 2 meshir ta osang angazüker.

Taküm Lok Sabha election nung BJP-i menden 240 nung dang takok angu aser iba jagi Kumar aser Naidu na teyari kanga nüngdaka aküm. Tena

teyari agia züngsem 543 agi akümba Lok Sabha nung NDA MP 293 lir.

Prime Minister Narendra Modi-i Deobarnü kümsük tasemben atongtepa prime minister inyaktsü tezüngzüktep agitsü. Linük nung mezügbuba prime minister Jawaharlal Nehru-i kümsük tasemben inyakba sülenbo Narendra Modi-i tang mezüng inyaktsü.

Deobar nikongdang NDA 3.0 sorkar tezüngzüktep agiba sentong nung Bangladesh, Sri Lanka, Nepal, Bhutan, Maldives aser Mauritius nungi lennirtem adentsü.

Tanur dak tashiyim inyakba atema tebilemetsü abener

Dimapur, June 8, 2024 (TYO): Khonoma nunger Dr. Vibino Sabina-i tanur ka züka merenshiba osang angashia temulung raksar aser iba inyakyim aitsür ta Naga Mothers' Association (NMA), Kohima-i ashi.

Asen loktiliba nung iba ama mapa inyakba osang angashidang temulung raksar aser talisa shia metetertemi inyakba ya magizükteter. Tangatetba shitak alir ajaki senso shia aser talisa tanurtem indang temeten aser parnok kümzüka ayutsüba osangtem prokshitsüla, ta NMA-i ashi.

Govt. Higher Secondary School, Jotsoma nung Principal aser staff-i Child Welfare

Committee ajanga tanur kümzüka asoshi tenüngsang agütsür ta NMA-isa ashi.

Child HelpLine 1098 ajanga tanurtem kümzüker aser nübortem dang tanurtem kümzüka ayutsü aser temeten prokshir.

Dr Vibino ya tang Jotsoma nung alir aser lai arishi küm 11 tain tanur tetsür ka dak teksa sangshia aruba putet.

Osang angazükba agi GHSS, Jotsoma nung principal aser staff-i tanutsüla dak tashiyim inyakba metet aser osang bangdakpur nem osang sangoktsü. Iba sülen May 30, 2024 nü Child Welfare Committee, Kohima-i tanutsüla kümzüker.

GB Abdul Kayum Talukdar khasetba bushisüandangtsü

Dimapur, June 8, 2024 (TYO): Dimapur nung June 7 aonung New Market GB Abdul Kayum Talukdar khasetba atema bushisüandang asütsü tetuyuba agütsüogo.

Nagaland Deputy Chief Minister Yanthungo Patton-i Talukdar taküm agiba ya asen loktiliba nung yimjung aser security anema lir ta ashi.

Iba ama ozüng alema inyakba khukhua aitsür aser Talukdar khasetba atema temulung raksar. Pa tepsetertem pua merenshitsüla aser asür kibong den asükhu lemsateper, ta Y Patton-i ashi.

Külen, Labour, Employment and Skill Development, and Excise Advisor Moatoshi Longkumer aser Dimapur District Citizens' Forum (DDCF)-ia sangdong balala ajanga Abdul Kayum Talukdar

khasetba aitsüba metetdaktüsügo.

"Iba ama taochi maliba inyakyim ajanga yimjung aser putepa aliba raksatsür aser loktiliba asoshi lendong bentsür arutsü. Asenoki iba ama tesempatsü mapa anema külemi longiemer noktaksüla aser ajak lendong nung jenbua alitsüsa tensa kümdaktüsüla" ta Advisor Moatoshi Longkumer-i sangdong ka nung ashi.

"Ozüng amertemi iba mapa inyakertem tekaratiba nung aputsüla aser temeten agütsütsüla. Asenoki ozüng amertem dak temulung lemdi aser ozüng kübok teinyaktsü tim inyaka odaktsüdi" ta paisa ashi.

Advisor Moatoshi-isa asür kibong den mangyimba osang lemsatepba den Tsüngremi

parnok nem tesünap agütsüba den asür tanüla anisüngzük ngudakjang ta metetdaktüsügo.

"Asen yimti Dimapur nung iba ama mapa inyakba atema temulung raksar. Goan Bura ka bazaar ama tesem ka nung tepsetra kecha masüba nisung ka taküm kong jenbua lir. Bangdak department-i iba tatalokba jungjunga bushisüandang asütsüla, aibelenertem aputsüla, parnok tenüng yimjak nung metetdaktüsüla aser lateta aliba ozüng kübok merenshitsüla" ta DDCF-i metetdaktüsü.

Mangatetep aliba ken o tem lira timi angatettepstsüla aser kechi nisung südir süaka shinga dak-a nisung ka taküm agitsü temeten mali. Iba tatalokba khukhua aitsür aser asür kibong den asükhu lemsateper, ta Media Cell, DDCF-isa ashi.

S. Supongmeren Jamir-i Lok Sabha election nung takok anguba asoshi tenüngsang benjong ayongzük

ULB ELECTION: CANDIDATE 8 NEM INC TICKET AGÜTSÜ



INC ticket angurtem den Congress party tenzükertem külemi tangokba noksa nung angur.

Mokokchung, 8th June (TYO): District Congress Committee (DCC), Mokokchung-i ayongzüka Indian National Congress candidate, S. Supongmeren Jamiri tawa tembangba 18 Lok Sabha MP election 2024 nung takok tulu ngutetba asoshi tenüngsang agütsüba den takok benjong sentong ka Yimchalu resort nung kaogo.

Iba sentong nung PCC member & ex-MLA -

Toshipokba, DCC president - Watimongba Aier, DCC vice president - Lanusanen, DCC secretary - Nükshi I. Ozüküm, DCC Advisor, DMCC, DCC minority department, NYC aser ACCC nungi meyonga ketdangsurtemi shilem agia liasü.

Sentong nung DCC, Mokokchung president, Watimongba Aier-i jembidang, Mokokchung ya Congress nükmén ta jembia aruba ama, tanü atangji nung küm 20 sülen

Lok Sabha MP election nung iba district nungi S. Süpongmeren Jamir-i takok ngutetogo, ta pelaba metetdaktüsü.

S. Süpongmeren Jamiri party ajungkettsü asoshi kanga meranga inyaka aru, tanü pa adokba ya pai aahzükba lir, iba tsüngnep mesamai teti bener aotsü asoshi asenok khuret südi ta sentepa alirtem ayongzük. 2028 nungji Nagaland nung Congress sarkar akümstsü nükjidong yur tang nungi

meranga inyaktsü asoshi paisa party pur ajungshia liasü.

Aji oda, tang aruya aliba ULB election nung shirnokisa Congress ticket agiogo, nenok ajaki takok angutsü imla-a atar aser maparen ajak nung party tenzükertemi yariteptsü mulunga lir, ta paisa shisem.

PCC züngsem & ULB Election Committee Convenor, Toshipokbai jembidang, ULB election nung Congress ticket agizüker ajak tenüngsang agütsü

aser tanü India lima political mopungsem melenshiba mapang ka lir, anungji, takok nguang tengu 2028 dak rangloker party akangakanga yangertsü asoshi ayongzüka jembia.

Iba sentong nung tang aruya aliba ULB election candidate 8 nem INC ticket agütsüogo aser parnok tenüngtemji; Mokokchung municipal kübok Mr. T. Nungshitemjen Jamir (Ward No. 15, Yimyu), Mrs. Rongsenlemla Jamir (Ward No. 16, Marepkong), Mangkolemba town council kübok Mr. Zamok (Nokyu ward), Changtongya town council kübok Mr. Marwati (Longchara ward), Tuli town council kübok - Mr. Temsumenba Imsong (Mendenti ward), Mr. Imlionen (Tuliyong ward), Mr. K. Imlitemjen (Longpong) aser Mr. Imobendang Lemtor (Lukongmendang ward) ta alitsü.

Mokokchung CMO Office nung World Food Safety Day mungogo



Dimapur, Aami/June 8 (TYO): June 7 nü World Food Safety Day amungba mapang food safety cell, CMO Office, Mokokchung-i ayongzüka Chief Medical Officer's office indang conference hall nung sentong ka agiogo.

Iba sentong ya "Food Safety-Prepare for the Unexpected" omen nung ajemdaker agia liasü. Sentong nung Designated Officer (Food Safety) C. Merenlemba-i lokti pela

agizükba o jembia liasü. Sentong nung o jembiba mapang Mokokchung ADC Chumlamo Humtsoe-i, ajak nem chiyongtsü tajung agütsü atema food operators tem ajungshi. Paisa, food safety aser chiyongtsü tamajungtem nokdangtsü, putettsü aser chiyongtsü anepalutsü koda tongtibang iba indang lemsatepa liasü.

Pai, chiyongtsü tamajung achiba ajanga timtem adokba, aser

shirangshiko balala nungi jenboa alitsü atema food safety dak sendakba nung jenjang tapet agitsü koda tongtibang iba indang lemsatep. Maneni pai food safety inyakyim sülen anidakba aser shishilembadak chiyongtsütem asadanga aoba atema Food Safety Zone, CMO Office nem tenüngsang agüja liasü.

Maneni CMO Mokokchung, Dr. Kibangkumba-ia, anema aser arishia alitsü atema food safety habits aser balanced diet dak sendakba nung tangazükba agüja liasü. Pai nüburtem dang office-i lateta tokja aliba food safety rules sülen anidaktsü ajungshia liasü.

Sentong nungsa Food Safety Officer Sukumlo Yanthan-i tepela o jembia liasü. Sentong tembangba sülen FoSTaC food operators tem training ka agia liasü.

Rubber tapping dak sendakba nung training agütsü



Dimapur, Aami/June 8 (TYO): Latex tajungtiba nung process süa adokdaksütsü atema Nagaland asoshi rubber tapping dak sendakba nung training ka Iksge yimtsüng nung tenzüko.

Iba training ya Rubber Board of India, department of Land Resources, Government of Nagaland aser Toka Multi Purpose Cooperative Society Limited nung longjemer ayongzüka lir.

Iba training atema district 13 nungi trainee tem adenshia lir aser parnok nem tanendak

aser chiyongtsü agütsütsü.

Rubber Board, Executive Director, Vaasanthagesan-i ashiba agi, rubber nungdakba tali küma aoba den rubber asoshi takhangba tali akümtsü. Paisa, lanurtem dang bendanga agüja inyaktsü ajungshiba den training shitak

agir aliba lanurtem mapang angutsü aser latex adokdaksüba jenjang tajungba kümdaktsütsü, ta ashi.

Sentong nungsa shisalen Sayuri rubber tapping dak sendakba nung trainees tem nem tangazükba agüja liasü.

Excise Narcotic Cell-i temesepba mozü apu

Dimapur, Aami/June 8 (TYO): June 5 nü Excise Narcotic Cell-i Chumoukedima kübok Patkai Bridge Highway temeket meita aoba mapang, AIEAtilo Kent-i anir duty party-i scooty ka sota liasü.

Scooty sota bushisüngdangba mapang parnoki Spasmo Proxyvon (Sampex+brand) capsules 2100 nguteta liasü. Iba sülen Peren kübok Ngwalwa yimtsüng nungi Enleu'er jabaso Kangzangpeu aser pa den mena alisang



Hangmai'er jabaso Heibamzeung na pua liasü. Tena ya NDPS Act 1985 kübok section tapet dak ajemdaker aitsüogo. Iba ken o ya maneni bushisüngdangdar.

State nung temesepba mozü achiba ajanga timtem tulu bener arutsüba nokdangtsü atema inyaktepba mapang duty party-i jenjang tapet agiba ya tenüng asangtsü langa lir, ta DY Commissioner of Excise S.Phyobemo Kikon-i sangdong ka ajanga metetdaksü.

Artang Ward Mkg. nungi ULB election candidate-tem jaoka sentong ka agi



Artang Ward Mkg. nungi ULB election candidate-tem jaoka sentong ka agir kelen candidate-tem, AAW pur, ward Yimden yimsüsür aser sentong nung shilem agirtem külemi tangokba noksa.

Mokokchung, June/Aami 08(TYO): Tanu Artang Ward, Mokokchung Community Hall nung Youth Association Artang Ward-i(YAAW) ayongzüka Artang Ward nungi Urban Local Bodies(ULB) election nung noktaker candidate-tem jaoka parnok nükjidong aser tebilemba lemsadaksüba sentong ka agiogo.

Iba sentong nung ULB candidate rongnungi parnok nükjidong aser tebilemba lemsaba mapang candidate Yongkongsangla-i lai la Artang Ward nung lia arudang Artang Ward terenlok leni anittettsü asoshi teinyaktsü aikadang reprangtetogo, anungji Artang Ward nung Mokokchung Municipal Council kübok ULB election Women Reservation ataba asoshi pelaseta iba

maongkaji agia Municipal Act dak ajemdaker Artang lima aser Artang nübur asoshi inyaktsü temelungtetba tulu nung noktaker ta ashi.

Laisa la tetsür ka dang süaka tebur den kasa Artang Yimden den angatettepa inyaktsü mangdang lir aser talisa Ao Baptist Arogo Mungdang-i Clean Election mapatong sangdonger kelen election 3,4 tashi agiyonga arur, anungji ABAM yimyim dakji rangloker ochishia pei senti vote agüja nübur meimba nübu shimdaksünerta adenshia aliba Artangsangertem ayongzü.

Tanabuba nung candidate Mapujungla-ia la ULB election nung candidate ka ama noktakba indang nükjidong aser tebilemba lemsaba mapang Mokokchung nung ULB election agitsü aliba nung Artang

Ward Women Reservation atarta asüba osang angashia Artangtsür ka ama Artang asoshi inyaktsü temelungtetba tulu nung ULB election nung noktaker ta ashi.

Mapujungla-isa alima nung terenlok maparen ajak liro medema otebaji tetsür tebur mebandangi inyakba ajanga adoker, ibaji agi tanu asen tendak ULB election nung tetsür nema shilem agidaksür, aji asünung Artang nüburi dang yimli agüja la shimra lai Artang nübur ola angaa aser yimden den tongtepratepa maparentem ajak inyaktsüta lemsatep.

Maneni ano candidate Bendangkokla-ia la ULB election nung candidate ka ama noktakba indang nükjidong aser tebilemba lemsaba mapang lai Artangji la taso lima aser ULB election nung Women

Reservation nung atarta angashia Artangtsür ka ama noktaker,tebur yimsüsüba nung jangratema lia aruogo,saka ano Women Reservation ajanga ano talila temaba nung Artang nüburtem tali dang longjemshir terenlok mapa inyaktsü tangatetba nung noktaker ta ashi.

Laisa Mokokchung nung Ward 18 rongnung Artang Ward nem Women Reservation atatsübaji kanga dang tim ta tangar ward-temi reprangtettsüsa la adokra Municipal Act kübok ochishir nübur meyonger ka ama inyaktsü temelungtetba tulu lirta lemsatep. Bendangkokla-isa la den külem tetokteper candidate-tem dang Artang Ward nung iba ULB election kanga dang ochishia tesüngjem nung agitettsüsa inyakdita ayongzüka liasü.

Kasa sentong nung Artang Ward Chairman Wb.T.Ati Mongro ajanga tajungshi o jembiba den candidate asemprongla nem Artang Ward tenzüksü mulungtetba asoshi Yimden tenüng nung pelaba lemsatepba den iba ULB election tesüngjem nung agitettsüsa inyaktsü asoshi t e k ü m d a n g t s ü t e m metetdaksü, Alempang Baptist Arogo Pastor Rev.Dr. Bendang Lkr-i candidate

asem(3) asoshi temoatsü meshia sarasademtsü iba den YAAW Ex.Member Wb.Lendinokdang ajanga tepela o jembi aser sentong nung Tsüngremer lenisüba jazüka Deacon Wb.Jungshi-i sarasadem. Kr.Kumzükienla YAAW Tongti Zülur ketdangsüba nung iba sentong agiba den Deacon Wt.Narola Longchar-i tenüngsang agüja sarasadema iba sentong tembang.

Youth Association Artang Ward-i iba sentong ayongba ya mapa tasen ka masü saka election agiba shia YAAW ajanga Artang nung election timi dang agitettsü asoshi Clean Election dak rangloker election shia candidate-tem jaoka iba sentong ya akar aser tang ULB election agiba nunga Clean Election dak rangloker iba election ochishia agitettsü tangatetba nung iba sentong agiba lir.

Candidate Yongkongsangla ya Congress ticket amer noktaker aser tanungba candidate anaji ano koba party nungi noktaksü ibaji ano medembangteti lir, saka candidate Mapujungla-ibo la NDPP ticket angutsü aser iba ticket amer noktaksüta la nükjidong aser tebilemba lemsatepba mapang lokti dang metetdakja liasü.



June 08, 2024 nü Bangladesh Ato kilonser, Sheikh Hasina New Delhi tonga arudang tangokba noksa nung angur. Amongnü Narendra Modi Ato kilonser tenangzükba agiba sentong nung adentsü atema Hasina-i Delhi semdanger.

Tanü nikongdang Narendra Modi-i Ato kilonser tenangzükba agitsü

New Delhi, Aami/June 08 (Agencies): Amongnü nikongdang 6:00 ako meta Bharatiya Janata Party (BJP) lenir, Narendra Modi-i Ato kilonser kümsük (term) tasembenbuba inyaksü atema tenangzükba agitsü.

Honibarnü BJP lenir kati, June 9 nikongdang 6:00 ako nung sorkar tasenba tenangzükba sentong agitsü, ta metetdaksü.

Tawa agiba Lok Sabha election nung BJP-i aniba National Democratic Alliance (NDA)-i menden 293 nung takok nguteta liasü.

Exit poll ajangabo BJP-i parnok kijai sorkar kümtetsüsa menden peria angutsü, ta sangdonga liasü saka BJP-i menden 240 nung dang takok angu, ibayongji parnoki JD(U) aser TDP densema NDA

teloktep nung aliba party tem teyari agia sorkar akümtsü.

Züngsem 543 aliba Parliament nung sorkar akümtsü atema menden 272 bosa nüngdaker. Ajioda NDA nung densema aliba Telugu Desam Party (TDP) aser Janata Dal (United) (JD(U) nati peipei states (Bihar aser Andhra Pradesh) nung menden 16 aser 12 nguteta NDA nungi masetshiba ajanga Modi leniba nung sorkar akümtsü.

Hokolbarnü NDA parliamentary party senden nung lenirtemi NDA nung lenir asütsü aser Ato kilonser menden atema Narendra Modi shim.

Amongnü Narendra Modi-i Ato kilonser tenangzükba agiba sülen taruba anogotem nung NDA-i minister tem aser parnok nem lemezüksüba portfolio sangdongtsü.

ECI-i Jammu & Kashmir nung assembly elections ayongzüksüa akok

New Delhi, June 08 (Agencies): Election Commission of India (ECI)-i Jammu & Kashmir nung assembly election ayongzükba agitsüsa sangdong ka agütsüogo.

Election Commission-i Jammu & Kashmir Union Territory nung registered unrecognized party tem dang 'common symbols' lemezüksütsü atema applications agüjang, ta sangdongogo.

2014 küm sülen nungi tenzükba Jammu & Kashmir nung assembly elections magir. 2018 küm June ita tashi dang Jammu & Kashmir nung Chief Minister liasü; iba mapang nung chief minister ji PDP lenir Mehbooba Mufti liasü.

2018 küm nungi tang tashi Jammu and Kashmir nung Governor's rule lir. J&K nung Arlla 370 agienba aser Jammu & Kashmir agi Union Territory kümtsüba mapang nungi J&K administration ya Lieutenant Governor, Manoj Sinha kübok

lir. Election Commission-i Election Symbols (Reservation & Allotment) Order, 1968 nung Para 10B kübok Jammu & Kashmir nung party tem nem 'common symbols' agütsütsü, ta sangdongogo, anungji kobi melii Jammu & Kashmir nung assembly election agitsüa akok.

Recognise süa aliba national aser state party tembo parnok indang 'reserved symbols' lir, ajisüaka registered unrecognized party temibo assembly election nung candidates toktepdaksütsü atema symbols meshitsüsa akümtsü. Election Symbols tetuyuba kübok registered unrecognized party kati 'common symbol' meshitsü akok.

J&K nung assembly election agitsü atema sangdong magütsü, ajisüaka yaküm December ita nung Supreme Court-i Election Commission dang 2024 küm September 30 anogo tashi nungbosa Jammu & Kashmir nung assembly election agiang, ta tuyuogo.

Tan hopta tetenzüklen Chief Election Commissioner (CEC), Rajiv Kumar-ia, J&K Union territory nung election agitsü atema kobi melii maparen tenzüksü, ta metetdakja liasü.

Yaküm December ita tetenzüklen Supreme Court-i Centre sorkar dang sangküm September 30 tashi nungbosa Jammu & Kashmir nung election ayongzükba agitsüla aser tekeratiba nung J&K nem state jenjang tanaben agüjang, ta tuyua liasü.

SC-i Election Commission of India dang 2024 küm September 30 tashi nungbosa Jammu & Kashmir nung Legislative Assembly election agitsü atema mera agia inyaksü tuyu.

2019 küm August 5 nü Centre sorkari Jammu & Kashmir nung Arlla 370 agien aser Jammu and Kashmir Reorganisation Act of 2019 benoka liasü aser ibaji ajanga Union territories of Jammu & Kashmir aser Ladakh tentet.

Naidu aser Nitish Kumar nati democracy kümzüksüla: Sanjay Raut

New Delhi, June 08 (Agencies): Honibarnü Shiv Sena (UBT) lenir, Sanjay Raut-i, linük temzüng aser democracy kümzüksü atema Telugu Desam Party (TDP) Tir N Chandrababu Naidu aser JD(U) Tir Nitish Kumar nati tongtibang shilem agitsüla, ta ashi.

Naidu aser Nitish Kumar napronglai BJP-i aniba NDA teloktep pusemba ajanga

parnoki maneni Centre nung sorkar akümtsü.

"Tang Chandrababu Naidu aser Nitish Kumar na atema tayongzükba tulutiba lir; tenati tena ya democracy külemertem aser democracy kilirtem lir ta jembir. Tang tenati pusemba ajanga sorkar akümer, anungji linük temzüng, ozüng aser democracy kümzüksüji tena teinyaksü mapa lir," ta Sanjay

Raut-i ashi.

Hokolbarnü India Tir, Droupadi Murmu-i Modi leniba nung NDA sorkar akümtsü atema temelaba agütsüba sülen Amongnü Narendra Modi-i Ato kilonser tenangzükba agitsü.

Amongnü nikongdang Rashtrapati Bhavan nung linük Tiri ketdangsüa Modi aser council of minister tem nem tenangzükba agidaksütsü.



June 08, 2024 nü Kochi nung aliba Puthuvype Beach nung 'World Oceans Day' anogomong nüngtem nung School of Marine Sciences (Cochin University of Science and Technology) aser Ocean Society of India nati senteper tzüyinküm merükdang tangokba noksa nung angur.

CWC-i LS nung Opposition Lenir menden atema Rahul Gandhi shim

New Delhi, June 08 (Agencies): Honibarnü Congress Working Committee (CWC) nung züngsemtem ajaki bangjemer party lenir Rahul Gandhi dang Lok Sabha nung Leader of Opposition (LoP) asütsü mepishiogo.

CWC züngsemtemisa Rahul Gandh-i Bharat Jodo Yatra ana agiba ajanga tawa agiba General election nung Congress-i menden aika nung takok angu, ta bangjem.

Congress Working Committee (CWC) senden amenba sülen party general secretary, KC Venugopal-i, CWC züngsem ajaki melungtepa Rahul Gandhi dang Leader of Opposition (LoP) asütsü mepishia asüngdangogo, ta metetdaksü.

"Rahul Gandhi-i pai tekeraba nung telemtetba agitsü ta shiogo," ta Venugopal-isa metetdaksü.

Congress nungi Rajya Sabha MP, Pramod Tiwari-i, "Atangji pa (Rahul Gandhi) Lok Sabha nung LoP asütsüla. Working committee temepishibaji ibaji lir. Pa ya kanga tasütait," ta metetdaksü.

Congress MP, Kumari Selja-i, "Rahul Gandhi LoP shimtsüji CWC taginüba liasü," ta ashi.

Maharashtra Congress Tir, Nana Patole-i, "CWC nung ajaki Rahul Gandhi LoP aginüa liasü aser linük atema pa nem ola adokdaksüner," ta ashi.

Congress lenir Ajay Rai-i, "Rahul Gandhi LoP asütsüji CWC taginüba liasü aser Parliament nung nüburtem atema pa nem ola adokdaksüner. State kar nungbo menden ishika dang anguba kuli onoki asadangdar. Parnoki Congress samatsütsü atemzükba liasü saka tamakok angu, aser tangbo linük nung Congress tanaben lir," ta ashi.

Punjab Congress Tir, Amarinder Singh Raja Warring-i, "Onok ajaki Rahul Gandhi dang LoP asütsü asüngdangogo. Pai dang Ato kilonser den tokteptetsü. Rahul Gandhi-i nokdak nung ang linük nung lanurtem kümzükba alitsü," ta ashi.

Yamaji Karnataka Deputy Chief Minister DK Shivakumar, Himachal Pradesh Congress Tir Pratibha Singh, Ramesh Chennithala, Adhir Ranjan Chowdhury, MP Deepender Hooda aser Gaurav Gogoi nungeria Rahul Gandhi LoP südaksünüba lemsatep.

Tawa election agiba sülen Lok Sabha nung second-largest party ji Congress lir.



June 08, 2024 nü Varanasi (Uttar Pradesh) nung Kashi Hindu University kima kaketshirtemi NEET-UG 2024 results tanaben reprangshitsü atema takhangba agüja longkak aitdang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, JUNE (AAMI) 09, 2024

Amajok otem jembiba

Nisung tepsetba, ashioktsüba aser nüktapangta temenentem dang asenoki Tsüngrem tsüngdang tai amato bilemer, ajisüaka Yisui ashir, " nisungi kechi amajok osa jembidir, parnoki iba o indangji obendangba anogo nung langzüsü," Mathi 12:36. Aiben iba o ya Laishiba nung shia lir ser nung asenoki süoki ia magir, kechiyong asenoki tiyazü aser amokmeren o tamajung jembibatem yabo temenen aser tai amato bilemer. Ajisüaka, tanü asenoki amajok o jembibatem ajak indang ya langzüsü atema kenü asenok Tsüngrem obendangdak nokdaksüsa akümtsü ta Laishiba ajanga angateter. Atangji, asenok aikati amajok otemji kechi otemsa asütsüar Laishibai ashibaji mangatetsüa akok, kechiyong asenoki anogo shia asen mulung nungi adokba o tajung aser tamajungtem ya mebendangteti jembir aser item o tem jagi tangar yirutsü ser nung asenoki memetetsüa akok. Aji oda, asenoki mekümdangi aser mebilemdangi jembiba ajanga amajok nung tangar yirudaksüba otemji amajok otem asütsü. Talisa tang ama asenok election agiba mapang ya menügdakba aser mapetba amajok o aika bener arua jembir. Item amajok otem jagi asenoki meteta tangar mulung yirutsür aser rarabangsen adokdaksür. Aji oda, menügdakba tamagitsü aser amajok o jembiba ajanga kibonga raksar aser lokti aser arogoa menendaksür. Amajok o tilaka jembibaji aiben mirok mi ama küma telok o telok na tsüngda rara tulu adokba asenokia ajangshir. Ajisüaka, asenoki aiben o mekümdangi jembibajiang temulung teindang aser ochi o jembir amai bilemer . Aji oda, tebang tamajung dang ashi, temulungbo tajung aser temerük ta aiben asenoki jembir. Ibaji taia ta asenok nem angatetdaksünüa Yisui ashir, " nenok per chirtem, nenok mejungi yur kechikodaser tajung jembitetsü ? kechiaser kechi agi temulung sünga lir, aji dang tebang agi jembir," Mathi 12:34. Item Laishiba tekongtem ya kodang zünyonga odir, atangji asen akaba nungi dang asenoki agütsütet ama, jembiba nunga asen mulungjang nung aliba dang asenoki jembitetsü ta asenoki tajungba-tajungba angatetsü. Yisua ibaji metetyong nisung shia mulungjang merüka alitsü atema tebang nungi amajok o mejembitsü asoshi kümdangshidaksüba Tsüngrem o ji ibai lir. Kasaji, Yakob-ia asenok tamangertem dang angatsüba nung karatsü dang ashi, jembitsü nung atapisatsü aser ain adoktsü nung meilongi asütsü indang Yokob 1: 19 nung shia angutsü. Atangji, asenok tamangertem aika dak aketba tashimait tulutibaji asenoki tangari jembiba mangar saka asenoki dang jembir, idangji asenok memetetba akümer aser asenoki tangar jembiba manga ser jembidang meteta aser memeteti tangar yirutsür. Aji oda, asen temulung aser tebang nungi adokba o shiaji tangar asoshi taküm, taneptsü aser teimla agütsüba o asütsü tim. Iba jagi dang tangari asen den Tsüngrem taochi aser tashi adenbaji metetsü. Efesa tapu 4:29 nung asenok tebang nungi o tamajung ka danga madokdaksüi kechi tajung yangluloktsü nungdaker, ajiang bilema aseni jembiba o angashirtem taochi angutsüsa jembiang ta ashiba asenoki angur. Atangji, asenok dang tai memenatsü atema o kenyongi tejembi ta ashir masü saka asenoki jembiba ajanga asenok Tsüngrem nungi anguba kasa taochiji asenoki jembiba angashirtema angutsüsa jembiang ta tenyar Paul-i asenok ama tamangertem nem angatetdaksünüba sayutsüngi o ji ibai lir. Atangji, asenoki kodang kechi jembitsü aji memetet, anungji anogo shia aseni jembiba o agi tangar temoatsü aser teyari angutsüsa Tsüngrem dang shisatsü aser asen tebang temeli azüoktsü tashi meshia sarasademer anogo tenzüksüba kanga nungdaker. Aji oda, aseni jembiba otem agi tangar taküm aser kibong yanglutsür asü mesüra raksatsür ta metetsü atema asen taküm aser temeli ya tanela temeshi nem anidaksütsüla.

OLEMSABANG

Tim masüba lenmang nungi bendenba rongsenji juli tapok nung enoktsü

~ L. Kika Pongener.

Tanü asenok aliba putu ya rongsen-rongsen dang penbua, rongsen nung dang tenuk yoker, amang-sangwa memeteti rongsen dang bushiba, aser manger-mesangwa tsüngda nung takar akümtsü arishitepba putu ka lir. Rongsen aika bendentsü arishidang, Tsüngrema amaa-adoker, pei kibong nung apuani aser chirnur-a dena kong lir memeteti amaa-doker, rongsen nung dang rangloker, mazüngi litepba putu ka lir. Atangji, tanü putu nung teka nung rongsen makara aser melira libalirotsü kanga tasak, aser rongsen makarbo lokti nunga mezüngshiba lima ka kümogo. Tanü putu nung nubur aikati rongsenji dang Tsüngrem/Kibur kümdaksür külemer. Laishiba nung züngra... Mathi-4:4, nungji, Yisu-i mojing dang langzüba kanga tongtipang 'o' ka shia angur..."Nisungi am tesa agi dangbo taküm malitsü, saka Tsüngrem bang nungi adokba o shia agi alitsü". Yisu Mojingi atidangba mapang ya, Pa anogo lir-nu aser lir aonung (40 days) tashi lumiseta arem nung jajar, kanga-sa yaseta aliba mapang ka liasü. Yisu atema iba mapang ya amtsük/ chiyungtsüji kanga-sa rongdaka nungdakba mapang ka liasü. Anungji pa yaseta aliba mapang nungji, 'Amtsük' jagi atidangra, mela-mela tatidang nungji tsüksü...ta mojing jagi bilemogo sudi. Ano Yisu atidangba putu nung ya, nisung taküm alitsü atema chiyungtsü/amtsük-ji kanga tongtipang liasü sudi. Mojing jagi Yisu-ji asen putu nung atidang ka asübo 'SEN' agi atidangla-a ta shisadanger. Tanüa asenok anogo shia/minute-second shia/mera-a aoba shia 'SEN' agi atidangdagi.

Atangji, tanü asen putu nunga iba küsa Mojing jagi, Yisu yaseta aliba mapang, 'Amtsük' agi atidangba amaji, asenok 'SEN' kanga-sa rongdaka nungdaker asünung, anogo shia asenok 'SEN' agi atidanger. Yisu-i Mojing dang langzübaji..."Nisung am tesa agi taküm malir, saka Tsüngrem bang nungi adokba 'o' shia agi dang taküm alir'...ta langzüba angur. Asen mimchir ya chiyungtsü/rongsen kisung agi taküm alir masü, saka Tsüngrem bang nungi jembiba o aser Tsüngrem taochi agi dang asenok taküm alir. Atangji, asen alir. Luke-12:16-20 nungji züngra, Yisu-i o entepba ka yamai shia angur..."Takar nisung kati alu nung tsük aika aro, aser pai pei sasa ashi...'Ni kechi inyaktsü ? Kechiaser ni kü tsük konga tayudak maka'. Aser pai ashi, ni kü jentem benzüker tuluba küma yangludi, aser idakji ni kü tsük rizüngtsü. Aser ni kü Tanela dang ashitsü..." Tanela küm aika asoshi na rongsen aika rizünga lir, kazüa liang... chiang... jemang... pelaa liang". Saka Tsüngremi pa dang ashi..."Na tamashisang; taonungsa ne Tanela ne dak nungi akangtsü, aser kechi rongsen nai rizünga aka aji shir meyong asütsü...??? Yisu-i Mojing dang, "Nisung am tesa agi taküm alir masü... Tsüngrem bang nungi adokba 'o' agi dang alir"... ta ashiba ama... Iba takarsang ya tsük aika rizünga akayongjia..."Tsüngremi taonungsa ne tanela ne dak nungi akangtsü"... ta 'o' ka ashinung...Pa asoshi aji tatempang liasü. Asen mimchirtemi asen ket nung rongsen lira jangradema alitsü amai bilemer dang ashi...Tsüngremi 'o' ka dang ashinung, asenok taküm lidaksüba tango sashiba ya iba minute-second nungji anena-adoktsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

CTC nung Associate Pastor Women Angazükshiba sentong agi



Aolijen (Mokokchung), June 08 (TYO): Associate Pastor Women Angazükshiba sentong 'Tetsür ka Taküm: Tesüiba, Tang aser Tarutsü' omen nung ajemdaker ABAM Women Ministry ajanga ayongzüka Aami (June) 4-7, 2024 anogotem nung Clark Theological College, Aolijen nung parnok 36 tashi arua takok ngua agiogo, ta sangdong ka ajanga metetdaksü.

Iba sentong nung Shisalen sayurtem aser onüktem yamai liasü: Dr. Tamsüyanger Aier, CTC, Aolichen - "Laishiba nung Tetsürtem", Prof. L.

Imsütoshi Jamir, CTC, Aolichen 'Tetsür aser Media', Dr. Arenla Lkr, CTC, Aolichen 'Tetsürtem den Tenzükba wadang nung Sannüker Tsüngi O', Rev. Sentimeren Pastor, MTBA 'Arogo nung Tetsür Tenzükba Wadang Koda Tongtipang'

Mrs. Alemla Mozür "Tetsür anema Tashiyim inyakba" aser Mrs. T. Arenla Lkr "Lokti aser Arogo nung Tetsürtemi ajangshiba Tebilemtsütem" onüktem liasü.

Iba sentong ya Associate Pastor Women-i Arogo aser lokti nung tetsür ka jenjang

aser teinyaktsü tayimjemba aser terajemba nung angateta, mangdang shitak yur nüburtem anitsü nükla nung 2019 küm nungi agiyonga aruba tatembangbuba sentong June 7, 2024 tashi nung Associate pastor women ajak agi 151 iba sentong nung denogo, ta Mrs. T. Arenla Lkr Secretary, ABAM WM-i sangdong ka nung metetdaksü.

ABAM WM ajanga tetsürtem asoshi khuret bena Arogotem nung APW tem den külemi teka amteper inyaka aodang Tsüngremi moajangma.

ANOGO ABEN TSÜNGREM DEN

BENDANGA AGÜTSÜBA TENLA

Aser Khristai kechi koda nenok meim aser teronem tanang atema tenla ama Tsüngrem nem asenok asoshi pei sasa bendanga agütsü, yamaji nenoki temeim nung jajang. Efesa 5:2

Tsüngremi asenok asoshi mapa tulu inyak aser aji temeim dak amendaka lir. Tejen Lai putu nungbo temaba putiri Tsüngremi dang temenen pongitsü pei menen yari shiruru balala tenla agüja tai tatok bushi. Iba indang shisadagra rongsen, mapang, anibelem kodaka sür alitsü ta bilemer. Par mapangbo anogoshia tenlabaji ozüng mapa ama liasü. Saka item ajak melena Yohan 3:16 nung ashi ama "Tsüngremi alima odang meim nung pai pei ajaso chir agütsü, shirisa pa dak amangdir mesamatsü saka teti taküm akatsü." Meimchir dak temeimtsü maket liaka Yisu Khristai asen asoshi teronem tanang ama tenla agüja Pei taküm agi talangzükba inyakba ajanga asen menentem toker teti tatem maka taküm alangzük.

Tanü amangbapurtemi iba taochi ya mangateteti pei jeminütsü jemba, chia-jema, inyaknütsü inyaka lirabang asenisa iba taaji angutsü. Asenok teinyaktsü ajunga agi Tsüngrem meimtsü, asen taküm, kibong aser alidak aser aolen ajak nung nüburtem dang temeim mapa Inyaktsü Tsüngremi asenok dang akanger. "Temeim mapa abensa-a inyakba nung tesasaba mali, saka temoatsü dang renloker."

Cuba nung pastor Rev. Lorenzo chioktsü US State Dept-i akhanger



Pastor, Rev. Lorenzo Rosales Fajardo aser pa kinüngtsü na noksa nung angur.

June 08, 2024: Mongolbarnü United States Department of State-i sangdong ka ajanga Cuba nung pastor, Rev. Lorenzo Rosales Fajardo tang tashi mechokba atema Cuba nung ketdangsertem aitsüba den külemi pa chioktsü atema takhangba agütsüogo, ta International Christian Concern (ICC)-i metetdaksü.

US State Department-i report ka ajanga, "Evangelical Protestant pastor aser non-denominational Monte de Sion Arogo nung lenir, Rev. Rosales Fajardo-i Cuba nung yimsü tsütsü lenisüba mapa inyakba aser Khristan yimsü dak sendakba mapatem inyakba atema pa pua aliba mapang nung pa dak kanga mejungi zükogo aser pa dak kanga mejungi benshiogo ta osang angashia onoki tebilemstü akar," ta metetdaksü.

Palma Soriano, Cuba nungi Rev. Rosales Fajardo ya 2021 küm July ita nung apuba sülen

nungi tang tashi tepuokdak lir; Cuba nung Communist sorkari meimchir temeden balala anema inyakba atema pai ola adokba agi pa ano küm pezü tali tepuokdak ayutsü tuyuogo.

2021 küm July 11 nü Cuba tesem ajaklen sensotemi sorkari yimsü temeden densema meimchir temeden balala anema inyakba aser linük nung chiyungtsü den mozü agi kanga anüngba atema nüburtemi longkak aita liasü.

Longkak aitiba nungji Rev. Rosales Fajardo-ia shilem agiba dang masü saka sorkar anema longkak aittsü atema pai sensotem ajungmeso, ta pa nem tai tonglokja liasü.

Pastor apuba sülen pa anüker sepaitemi pa dak natzü naloktsü aser pa dak mejungi azükdang tepo-a lokdoka liasü; iba dak alia jail nunga ketdangsertemi tangar dang nungi alakteta pa kanga mezüngmeshi, ta US state department report nung shia lir.

Rev. Rosales Fajardo-i jail nung puoka alirtem den Khrista osangtajung lemsateper, ta aija jail ketdangsertemi 2022 küm Easter jakdang pa tepuokdak temeja ka nung ayu.

Cuba nung ketdangsertemi pastor kinüngtsü danga, nai nü kinüngbu pusema ola adokba manenra majungtsü, ta amokmerenogo.

US State Department of state indang Countries of Particular Concern (CPC) list nung Cuba linüka densema lir.

Yaküm May ita nung Cuba nung Social Communication Law agizüka liasü aser iba ozüng kübok yimsü temeden ano taliba nokdang.

Tawa interview ka nung jembidang Khristan melungtet telok, Christian Solidarity Worldwide nung advocacy tongti, Anna Lee Stangl-i, Cuba nung sorkari Khristan yimsü aser Khristan lenirtem tsübur, ta metetdakja liasü.

ISWAP kiralongrartemi Nigeria nung Khristan asem khaset



Nigeria kübok Borno state nung Islamic State West Africa Province (ISWAP) kiralongrartemi Khristan asem khasettsü lia tangokba noksa nung angur.

June 08, 2024: Nigeria kübok Borno state nung Islamic State West Africa Province (ISWAP) kiralongrar teloki Khristan asem khasetba noksa kar social media ajanga prokshio, ta International Christian Concern (ICC)-i metetdaksü.

June 4, 2024 nü Islamic State group (ISIS)-i lemsatepba noksa nungji Khristan asem temokok agi ali nung nendaker lir aser parnok sülen prangpong amer kiralongrar asem lir.

Ano tanga noksa ka nung Khristantemji ali nung laoer lir aser kiralongrartem indang machine gun prangpong nungi injang khadokba mokozü adoka lir.

Osang angazükba agi, kiralongrartem jagi June 3 nü Khristan asemji gari ka nungi pua liasü. Gari nung mena alir Muslim nungertembo aotsü

mela saka Khristan asemji apu. Kiralongrartem jagisa nisung kata apu, ajisüaka pajibo kong aliar memetet.

Christian Association of Nigeria (CAN) kübok Yobe State Chapter nung secretary, Rev. Ibrahim Abako-i kiralongrartemi Khristan asem tepsetba osangji metetdaksü.

Rev. Ibrahim-i, "Christian Association of Nigeria, Yobe State chapter tenüng nung onoki Damaturu-Biu Road Federal Highway nung Khristan lanur asem tepsetbaji sashia aitsür," ta metetdaksü.

2016 küm January ita nung Boko Haram telok nungi jakzüka tentetba ISWAP teloki Nigeria kübok yim aika nung Khristantem tiben maakogo.

Parnoki amakba mapang nung Khristan 12 tepset aser Khristantem meyong ki aika rongdoktsüba sülen Khristantem jenshiogo.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Süshisüra

(n) tangar tashi kati temulung aser tokolok ramaa kümdaktsüba (loss of sense)

* Onok arem nung lenmang mangu kanga süshisüra yim atong.

Süsü

(adj) tesepra masü (smooth surface)

* Mapa inyakeri süngpak kanga junga süsür angenlok.

OLONG PAITEP # 6813

Grid for OLONG PAITEP # 6813 with numbers 1-24 in a crossword pattern.

TIPLIN

- 1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzunglu den külemi tsüker - (3)
17. Aso tila - (6)
20. Tashi maküm - (4)
24. Tenung kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. _ _ _ tatsü - (3)
12. Tebur kidong aser zünga kasa tsüngda jatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6812 TELANGZÜBA

TIPLIN :

- 1. Nüngtugo, 5. Labi, 6. Kasa, 7. Aso, 8. Tangar, 11. Petinu, 15. Ngd, 16. Süin, 17. Esep, 18. Tesangwa.

LANGTSÜNGLEN :

- 1. Nükshi, 2. Nashi, 3. Olong, 4. Kima, 9. Aon, 10. Ajunga, 12. Tenet, 13. Anüng, 14. Empe.

NAI-A YA METETTER MA



Alima nung "Solar-Powered Building" tulutibaji Apple Headquarters, California lir. I ba ki dang Apple Park ta ajar aser Foster + Partners ajanga design asü. Cupertino nung yangluba Apple Headquarters ya ali acre 175 nung yanglu aser 17 megawatts indang rooftop solar panels enoka lir. Apple Park dang Apple Campus 2 ta-a ajar aser April 2017 nü iba ki lapoka liasü.

Khalistani lennir Amritpal Singh tsüraburtemi pa den ajurutep



Dibrugarh, June 8, 2024

(Agencies): June 8 nü 'Waris Punjab De' tanishir aser Khadoor Sahib Lok Sabha independent MP Amritpal Singh tsüraburtemi Dibrugarh jail nung pa semdangogo.

"Tawa election nung Punjab nungeri yariba atema kanga pelar. Punjab nungeri Amritpal nem vote agütsüba atema pelar. Pai Lok Sabha MP tezüngzüktep agitsü atema yakta chioktsü" ta Amritpal tebu Tarsem Singh-i ashi.

"Amritpal-i Punjab nung drug khuret nungi kümzüksü mapa inyak. Sorkari pa tepuokdak ayutsü lemtetba atema nisungtem

mepelar" ta pai ashi.

"Public-i ozü jabaso nem takok tulu ngudaktsüba atema pelar. Pa tepuokdak nungi yakta alutsü. Sorkari pa chioktsüsa akümsü kechiyong nübertemi pa nem takok tulu ngudaktsüogo" ta Amritpal tetsü Balwinder Kaur-i ashi.

June 4 nü Lok Sabha election nung takok anguba sülen Amritpal Singh kinungtsüi pa Dibrugarh Jail nung semdanga liasü.

"Taruba mapaji pa bail nung chioktsüba lior. Sorkari pa chioktsüla kechiyong tanga lenmang kecha mali" ta Amritpal

atema lawyer Rajdev Singh Khalsa-i ashi.

"Amritpal Singh-i Punjab nung drug amshiba samatsütsü atema bendanga agüja inyak. Pai Punjab drug-free kümdaktsütsü meranga liasü. Pa apuba ya ozüngi memelar ta nübertemi sayuogo" ta Rajdev-isa ashi.

Tepuokdak liaka Khalistani lennir Amritpal Singh-i Punjab nung Khadoor Sahib Lok Sabha menden nungi takok tulu ngua liasü.

Pai Congress candidate Kulbir Singh Zira madak votes 197,120 agi takok angu ta Election Commission-i June 4 nü ashi.

Jiribam district-i Manipur police commando talila yokogo

Imphal, June 8, 2024

(Agencies): Jiribam district nung tensa mejungi akümba agi Kangla Fort nungi Manipur police commandos telok ka yokogo.

Honibarnep Indian Air Force helicopters ajanga Manipur Police commando contingent ka Jiribam-i yokogo aser parnoki telungpurtem anema inyakba mapa nung yariteptsü.

Lisopur telungpurtemi arishi

küm 60 tain aluyimertem ka tepsetba aser police outpost ka den ki aika rongdoktsüba sülen Jiribam district nung security tali akangshiogo.

Sub Inspector S. Kishorjit Singh-i CDO teloktem ketdangsüa inyaker ta Director General of Police (DGP) Manipur Rajiv Singh, IPS-i ashi.

Tanga tetuyuba ka magütsü tashi Commando officers aser

Imphal West, Imphal East, Thoubal, Kakching den Bishnupur police tem Jiribam nung mapa lemküksüogo ta pai ashi.

Telungpurtemi Lamtai Khunou, Dibong Khunou, Nunkhal aser Begra yimtsüngtem nung ki rongdoktsü.

Telungpurtemisa Honibarnep 12:30 ako meta Barak River anasa aliba Jiri police outpost rongdoktsü.

Assam Rifles-i lanur 5 telungpur telok nungi kümzük



Imphal, June 8, 2024

(Agencies): Manipur nung Indo-Myanmar arrtsülen Assam Rifles sepaitemi lanur kar telungpur telok toktsüdaktsür anir aruogo.

June 8, 2024 nü Headquarters Inspector General Assam Rifles (South), Mantripukhri nung sentong ka agidang lanur pungu pei pei kibong den tanaben longjemogo.

Parnok ya loktiliba nung rehabilitation aser reintegration atema pei pei tetsütem ket nung agütsü.

Lanur pungu yagi People's

Liberation Army (PLA) aser People's Revolutionary Party of Kangleipak-Progressive (PREPAK-PRO) nung züngsem aküm.

Bishnupur district nungi M Malemnganba (27), Imphal West district nungi Amarjit Khundrakpa (24) aserImphal East district nungi Laishram Rohit Meitei (17) nunger PLA nungi anitet.

Ano, Imphal East district nungi Aakoijam Wilson (21) aser A. Victor (24) naprong PREPAK-PRO nungi anitetogo.

Parnok telungpur teseptemi

anir aoba sülen kanga mejungi ayu aser mapatem inyakdaksü. Külen, Myanmar Army aser telungpur teloktem raraba ajanga parnoki tesept toktsür jena ao.

Assam Rifles-i parnok telungpur ket nungi anitet aser iba atema parnoki Tengnoupal district nung mapa inyaka liasü.

Assam Rifles-i Manipur aser North Eastern Region ajunga nung nübertem kümzükba ayutsü atema mapa inyaker ta Lieutenant Colonel, Staff Officer (Public Relations & Media)-i sangdong ka nung ashi.

Bahrain-i tesendaktep yanglushitsü atema Russia ajanga Iran dangi osang yok

Manama, Aami/June 8 (Agencies): Iran den diplomatic tesendaktep yanglushitsü atema Bahrain-i Russia ajanga osang yokogo, ta presidential adviser Mohammad Jamshidi-i ashiba Iran nung news outlet balala ajanga metetdaksü.

Linük ana tsüingda küm aika mangatettep adoka arur Iran den tesendaktep yanglushitsü asoshi mulunga aliba indang Bahrain nung ketdangsürtemi lokti senden balala nung jembia aruba sülen Hokolbarnü iba osang ya metetdaksüogo.

"Bahrain-i Iran den tesendaktep yanglushitsü atema Russia ajanga osang yokogo," ta Jamshidi-i ashiba Iran indang Press TV sangdong ka ajanga metetdaksü.

Saudi Arabia aser Iran na tesendaktep tamajungba kuma oya aliba mapang ka nung 2016 küm Manama-i Tehran den

tesendaktep mayutsü atema telemtetba agia liasü. 2011 küm sorkar anema linük ajunga nung longkak aitba nung shilem agiba atema Bahrain-i Iran aija tesendaktep raksa liasü.

Taoba küm China teyongtsüü ia Saudi Arabia aser Iran na tesendaktep yanglushiogo.

Taoba ita Moscow semdangba mapang Bahrain chuba Hamad bin Isa Al Khalifa-i ashiba agi, Iran den tesendaktep yanglushitsü atema par linüki mulunga lir.

Bahrain indang state news agency BNA-i ashiba agi, linük ana tsüingda tesendaktep yanglushitsü atema menomeyangtsü kecha nüngdak madoker ta pai shiogo.

"Kidanger ka ama Iran den diplomatic tesendaktep yanglushitsü onoki meranger, aser iba tesem nung yimjung benoktsü atema nenoki onok

nongita yariba pelashishia agizüker," ta paisa shisem.

Taoba ita Bahrain chuba-i, Iran lenir Ali Khamenei dangi asükhu lemsatepba osang ka yokogo. Pai tir Ibrahim Raisi ajungbena helicopter tsükokba lendong nung asüba asükhu lemsatepba liasü.

2020 küm United States teyongtsüü ia inyakba sülen Bahrain-i, Israel den tesendaktep yanglushitsü atema tenangzüktepba ka nung sign süa liasü. Iba sülen küm ana lir Bahrain aser Israel na security dak sendakba nung teka amteper inyaktsü atema tenangzüktepba ka yanglua liasü.

Yemen nung Iran den sendaktepba aliba Houthis teloki rongtem amakba anema nokdaksü atema taoba küm December ita Bahrain, US-i aniba telok ka nung dena liasü.

Yemen nung Houthi teloki UN staff & aid worker tem ayu

Saana, Aami/June 8 (Agencies): Yemen nung Houthi teloki United Nations kübok inyaker 11 sota yua lir, ta UN otongdar Stephane Dujarric-i ashiba den, staff tem chioktsü atema takhangba agütsüogo.

Dujarric-i Hokolbarü ashiba agi, Yemen nung parnok kübok inyakertem kechiba sota ayu iba indang kuli UN-i Houthi telok dang meshiogo. Tetsür ana aser tebur teku ya Yemen nung US agency pongu aser UN envoy kübok inyaker.

"Parnok ajak takaratiba nung chiokdaksütsü asoshi onoki takokba tashi lenmang ajak nungi merngdangdar," ta Dujarric-i ashiba den, UN-i staff tem den tongtepratepner, ta shisem.

Tesem balala meita aoba mapang Houthi intelligence ketdangsürtemi US-i senotsü teyari agütsüba pro-democracy group National Democratic Institute (NDI) züngsem asem, local human rights group züngsem asem aser Yemen

nung alima kintemi agizüker aliba sorkar kübok ketdangsür asem pua liasü.

Human Rights Watch (HRW)-i ashiba agi, Houthi teloki parnoki pua alitem koba tesem nung yua ali iba indang osang agütsütsü memulungba ya international temzüng ozüing kübok aibelen ka asütsü.

"Houthi teloki human rights aser humanitarian maparen balala atema UN kübok inyakertem aser tanga telok nung inyakertem pur oar aliba ya tangsa tang chioktsüla, aser nisung mashi mashi pudena parnok taolen mejangjai kümdaktsüba tangsa tang anentsüla," ta HRW nung Yemen and Bahrain researcher Niku Jafarnia-i ashi.

Item nisungtem ya kechiba pur ao iba indang kuli tejangja memetet. Ajisüaka Houthis aser alima kintemi agizüker aliba sorkar na tsüingda mangatettep tali kuma aoba mapang ka nung iba ya atalokogo.

Taoba ita sorkari bank ajak

dang parnok indang headquarter tem Aden yimti-i belentsü tetuyuba agüja liasü. Iba ajanga Houthi teloki azüoker aliba tesemtem rongsenketzüng nung tali nongshitsü. Houthi teloki linük yimtiba Sanaa atsünger lir aser temzüng ozüing kübok parnok ya chichiba yimsüsürtem lir ta shia arudar.

Bloomberg News-i Brehostibarnü sangdong ka ajanga ashiba agi, Houthi teloki tzüyim nung rongtem amakba manenra, taoba küm December ita yimjung asoshi United Nations-i sentong yangluba koba iba telok yagi agizüker lir iba ya shilem tuluba ka nokdangtsü atema Washington-i asadangdar.

November ita nungi tenzuka Yemen nung Houthi teloki drone aser missile tem amshia Temerem tzüyim aser Gulf of Aden nung rongtem maka arudar. Gaza nung rara anendaktsütsü atema Israel nongshitsü atema parnoki iba jenjang agia arudar.



Britain indang Princess of Wales, Kate Middleton-i, la cancer tashidak anepaluba mapang ka asüba ajanga Honibarnü military parade (Trooping of the Colour parade) nung shilem magitetba atema tatok meshia military regiment dangi shiti ka züluogo.

Office of the
LIONS' CLUB (SANGPU) LONGSA VILLAGE
Mokokchung, Nagaland
TEPELA YIMYIM

Lensanir **Wb. S. Supongmeren Jamir**, S/o Lt. Shilumang Jamir, NPCC President, 18th Lok Sabha election nung takok tulu anguba asoshi Tsüngrem tenüng asanger aser asen Naga nüburtem teyariteper ajak dang Sangpu Lions' Club ajanga pelaba lemsateper.

Nübur tenzükba wadang tuluba nung ajemokdang Tsüngremi lenir nem shisatsü, arishi aser anema aliba taküm maneni moajang ta asen club sanger ajak sarasadem.



Sd/-
Sb. Temjenmeren
Tir

Sd/-
Sb. Temsütoshi
Tongti Zülur

Molungnen O
"Tsüngrem asen jenokdak aser tashi, timtem nung anasatiba teyarir." - T. Ken 46:1



Lt. ONENLEMLA (CHUCHUYIMLANG)

Nai onok toktsür kodanga tatem makaba lima nung alitsü asoshi oer tanü küm ka abensaka, nü ochi temeim aser tongmelang yimya mapa tajungtem mamateti onok den na ali ama menungra-a kinüngertem ajaki sarasadema amonger.

~ Temeim kinüngertem.

Hamas puri pur or aliba Israel nung 4 kümzükogo

Jerusalem, Aami/June 8 (Agencies): October 7 nü Hamas teloki Israel amakba mapang Nova music festival nungi pur aoer Israel nung pezü kümzükogo, ta Israel army-i sangdong ka ajanga metetdaksü.

"Yirur alirtem aika ali nung dang mejanga lir aser medical team temi parnok ket nung aliba mozütem amshia item nisungtem kümzüktsü merangdar," ta ministry-i facbook ajanga metetdaksü.

China nung asoba Isreal nung Argamani-a benjung nung dena aliba mapang pur oa liasü. Video ka koba tebu Yaakov Argamani-i Israel indang Channel 12 dang jangjashitsüogo, iba video nung arishi küm 25 tain ya motorbike ka tesülen pur aoba mapang "ni tetepset" ta ayima aoba nguogo.


Maneni Honibarnü Argamani aser tebu na menerema longjemba video ka nguogo.

Kasa mapang nung Russia nung Kozlov shiba 2022 küm Israel-i oa liasü, pa iba benjung mapang security guard ka ama inyaka liasü.

Ano pur aoer rongnung Jan, iba benjung nungi jena aotsü merang. Pa aser par medemertem par medemsang indang gari tonga jena otet, ajisüaka tatsüka dang orr parnok sota liasü.

Tekümzükertem rongnung ano Ziv ya iba benjung mapang security detail nung shilem ka liasü.

Budapest Ranking Series: Wrestler Anshu-i silver medal angu



Anshu Malik

Aami/June 8, 2024 (Agencies):

Budapest Ranking Series 57kg category final nung India tsür Anshu Malik atema arishi kum 21 tain Chian tsür Kexin Hong jungrara liasü aser lai silver medal dang ngutetogo.

Word No 1 asayar Kexin Hong den asayaba mapang Anshu-i asaya 1-12 ta technical

superiority agi tamakok ngua liasü.

Kasa asayamung nung India tsürsa Antim Panghal-i 53kg category nung silver medal nguogo, ajisüaka Vinesh Phogat-bo 50kg category quarterfinals nung China tsür Jiang Zhu-i 0-5 agi tsükdakja liasü.

Iba asayamung nung Anshu-

i kanga junga asaya tenzük aser lai Moldova tsür Anastasia Nichita 6-5 ta point ka agi koka semifinal-i ia liasü. Asaya atemtsü atema second 19 dang anunga lia Nichita 5-4 agi tejakdang liasü, saka Anshu-i takedown ka score süa lai asaya 6-5 agi koka liasü.

Iba sülen semifinal asaya nung lai world champion China tsür Zhang Qi 2-1 agi koka final-i ia liasü.

Ajisüaka final asaya nung Hong ya la dang nungi kanga tajungba liasü aser mezüngbuba round nung Hong 4-1 agi tejakdng liasü. Tanabuba round nunga Anshu dang nungi Hong kanga agi tajungba liasü aser lai asaya ayong ayonga akok.

Kasa asayamung nung teburtem rongnungi Aman Sehwat-i mezüngbuba anogo silver medal ka nguogo. Final asaya nung pai Japan nunger asayar Rei Higuchi 1-11 agi makok. India nunger tebur wrestler tem rongnungi Aman kija Paris Olympics atema qualify sür lir.

Iga Swiatek-i French Open tasembuba kokogo

Aami/June 8, 2024 (Agencies):

Iga Swiatek-i taküm agi kum asembuba atonga French Open tetsür kija asaya kokogo. Lai kum pongu nung iba asayamung pezübenbuba kokogo.

Honibarnü tetsür kija asaya final nung lai Jasmine Paolini 6-2, 6-1 agi ayong ayonga koka liasü.

Court Philippe Chatrier nung tetsür kija final asayaba mapang top-seeded Swiatek ya 1-2 agi tesülen liasü ajisüaka iba sülen lai taruba asaya 10 prongla koka mezüngbuba set akok aser tanabuba set nunga la 5-0 agi tejakdang akum. Lai Roland Garros nung asaya 21 tashi nung khen danga tamakok mongui asaya arudar aser la indang career record tang 35-2 lir.

Justine Henin-i 2005 nungi 2007 tashi nung French Open asemben atonga akokba sülen arishi kum 23 tain Poland tsür la yagi tang mezüngbuba iba asayamung kum asem atonga kokogo. Swiatek-isa 2020 kuma French Open kokogo aser 2022 kum US Open koker lir. Lai



Iga Swiatek

tang tashi nung Grand Slam 5 tashi koker lir.

Kasa mapang nung arishi kum 28 tain Italy tsür Paolini ya tang mezüngbuba Grand Slam final ka nung asayaogo.

Lai Grand Slam asaya nung khen danga tanabuba round adena asayadanger maliasü, ajisüaka taküm January ita Australia Open nung la round pezübuba tonga asaya aser tang French Open nung final tonga asayaogo.

Paolini ano Deobarnü French Open tetsür tarep asaya final asayatsü lir. La indang partner Sara Errani den la final nung 2023 U.S. Open singles champion Coco Gauff aser Katerina Siniakova na den asayatsü.

T20 World Cup: Afghanistan-i run 84 agi New Zealand kokogo



Tang US aser West Indies nung asaya aliba T20 World Cup nung Afghanistan-i run 84 agi New Zealand koker pelaba noksa angur.

Aami/June 8, 2024 (Agencies):

Tang US aser West Indies nung asaya aliba T20 World Cup nung Afghanistan-i run 84 agi New Zealand kokogo.

Afghanistan team mezüng batting amenba sülen parnok rongnungi Rahmanullah Gurbaz-i ball 56 nung run 80 yanglua tejadang team sür ani aser külem opener Ibrahim Zadran-i ball 41 nung run 44 yanglua liasü. Afghanistan team-i asayar 6 out sür run 159 yanglua liasü.

Tanabuba innings nung New Zealand team-i over 15.2 nung asayar ajak out sür run 75 dang yangluteta T20 international asaya nung tang mezüngbuba Afghanistan nem kokdaksüogo.

"New Zealand amala team tulu ka akokba ya T20 nung onok asoshi tang tashi nung

takok tulutiba asütsü," ta Afghanistan captain Rashid Khan-i ashi. "Iba team anir asayatsü ya jangrademtsüka," ta paisa shisem.

Iba asaya nung Afghanistan nunger bowler tem rongnungi Fazalhaq Farooqi-i kanga junga asaya-a pai over 3.2 nung run 17 agütsür wicket 4 agia liasü. Paisa Hombarnü Uganda den asayaba mapang wicket pongu agia liasü. Asaya nung captain Rashid-ia run 17 agütsür wicket 4 agia liasü.

New Zealand nunger asayatem rongnungi asaya anati dang run 10 alema yanglutet aser parnok rongnungi Glenn Phillips-i (run 18) run timtiba yanglua liasü.

Iba asaya akokba sülen Afghanistan team Group C nung temaba jenjangi tuogo aser New Zealand team

ponglang nung lir.

Kasa asayamung nung Bangladesh aser Sri Lanka na asaya Bangladesh-i kokogo. Iba asaya makokba densema SL team asaya ana nung tamakok nguogo aser parnok Group D nung ponglang nung lir.

Asaya nung Sri Lanka-i over 20 nung asayar 9 out sür run 124 yanglua liasü. Parnok rongnungi Pathum Nissanka-i dang junga asayateta pai run 47 yanglu.

Asaya tanabuba shilem nung Bangladesh team-i asaya junga metenzüktet aser parnoki run 28 yanglur aliba mapang asaya 3 bo out süatoker liasü. Ajisüaka Towhid Hridoy-i ball 20 nung run 40 yanglu aser Litton Das-ia ball 38 nung run 36 yanglua team takok dangi ani.

Qatar den away asaya atema Stimac-i asayar 23 shimogo

Aami/June 8, 2024 (Agencies):

India football team head coach Igor Stimac-i Qatar nung oa World Cup Qualifier asayatsü aliba atema

Honibarnü asayar 23 tenung sangdongogo. Iba team nung defender tejen asem; Mohun Bagan nungi Subhasish Bose, Mumbai FC nungi Amey Ranawade aser East Bengal nungi Lalchungnunga nunger züngoksema mali. India aser Qatar na Mongolbarnü asayatsü.

Sunil Chhetri asaya nungi anenba sülen India team atema iba asaya ya mezüngbuba asütsü, shiba Brehostibarnü Salt Lake Stadium nung World Cup Qualifier round tanabuba nung Kuwait den tatemsa asayaogo. Iba asaya draw nung tembanga liasü.

Kuwait den asayaba mapang Stimac-i Jay Gupta nem asayatsü atema maongka agütsü aser Bose aser Ranawade naprongla masayadaksü liasü.

Ajisüaka Kuwait den asayaba mapanga Lalchungnunga bo India team nung züngoksema maliasü.

Iba asayamung nung India-i point 5 ngua lir aser Group A nung parnok Qatar sülen tanabuba jenjang nung lir. Iba telok nungi Afghanistan aser Kuwait natia point 5 aser 3 ngua tasembuba aser pezübuba nung lir.

Qatar bo tasembuba round atema qualify süatokogo, ajisüaka India densema team asemprongla qualify asütsü atema maongka lir.

Kuwait aser Afghanistan nata tatembangbuba asaya asayatsü lir.

Asia World Cup Qualifier tasembuba round nung shilem agütsü atema India team-i Qatar akoktsü nüngdaker.

Afghanistan aser Kuwait na asaya draw nung tembanga India team asoshi point ka teperi asütsü.

Ajisüaka Qatar mekokra India team qualify masütsü. Timla mesamatsü atema parnok draw bosa asütsüla.

India team:

Goalkeepers: Gurpreet Singh Sandhu, Amrinder Singh, Vishal Kaith.

Defenders: Anwar Ali, Jay Gupta, Mehtab Singh, Narender, Nikhil Poojary, Rahul Bheke.

Midfielders: Anirudh Thapa, Brandon Fernandes, Edmund Lalrindika, Jeakson Singh Thounaojam, Lallianzuala Chhangte, Liston Colaco, Mahesh Singh Naorem, Nandhakumar Sekar, Sahal Abdul Samad, Suresh Singh Wangjam.

Forwards: Manvir Singh, Rahim Ali, Vikram Partap Singh, David Lalhlansanga.

BILEMDANGANG

"Sentong tapet yanglur jenjang agira aibelen kangabo memenar."